

Državni simboli Bosne i Hercegovine

Bosna i Hercegovina ima svoje simbole koji je predstavljaju u svijetu. Glavni državni simboli su: **zastava, grb, himna i novac.**

Državna simbolika kroz historiju

Mijenjajući vladare, tokom duge historije, Bosna i Hercegovina se predstavljala različitim državnim simbolima.

Tokom 500 godina duge državnosti Bosne, njeni vladari su imali svoje državne simbole koji danas govore o historiji naše domovine.

Zajednički simbol svih srednjovjekovnih državnih simbola je **zlatni ljiljan** koji se može naći kako na zastavama i grbovima tako i na zlatnicima tog razdoblja.



Grbovi Bosanske kraljevske porodice Kotromanić i bosanskih plemića



Ljiljani na stečku
- bosanskom
srednjovjekovnom
nadgrobnom spomeniku



Grb dinastije Kotromanić - štit plave boje, koji je na pola podijeljen srebrenom dijagonalnom gredom, u čijem se lijevom i desnom polju nalaze po tri zlatna ljiljana, sve nadvišeno viteškom glavom sa plaštom i krunom Kotromanića. Ljiljan na grbu dinastije Kotromanić je ljiljan koji je specifičan za Bosnu "Lilium bosniacum".

Najvredniji spomenik na kojem su prikazani državni simboli srednjovjekovne Bosne jeste plašt kralja Tvrtka, koji je pronađen u njegovom grobu u Arnautovićima kod Visokog. Bio je ukrašen zlatom izvezenim grbovima sa ljiljanima. On se danas nalazi u zbirci Zemaljskog muzeja u Sarajevu.



Novac kralja Tvrtka II, zlatnik Kralja Tvrtka I (XIV stoljeće) sa ljiljanima, novac kralja Stjepana Tomaševića – zlatnik sa zlatnim ljiljanom



Zastava Bosne i Hercegovine za vrijeme austrougarske uprave. Grb je predstavljao: zlatni štit, iz čijeg lijevog srebrenog obruba izlazi crvena oklopljena savijena ruka, koja drži srebrenu sablju, sa zlatnom drškom, okrunjen krunom od ljiljana.

Zastava i grb SR Bosne i Hercegovine
Grb NR/SR Bosne i Hercegovine. Iza dva ukrštena snopa pšenice nalaze se dva dimnjaka iz kojih se puši. Sve je okruženo vijencem s crvenom trakom. Vijenac se sastoji od jelinih grančica sa desne strane i grančica bukve sa lijeve strane, nadvišen zlatno obrubljenom crvenom petokrakom.



Zastava Bosne i Hercegovine (1992-1998)
Grb Republike Bosne i Hercegovine (1992-1998) zasnovan je na grbu prvog bosanskog kralja Tvrtka I Kotromanića. Grb predstavlja zlatno obrubljeni plavi štit, podijeljen na dva polja srebrenom dijagonalnom gredom sa po tri ljiljana zlatne boje u svakom polju.

Današnji državni simboli Bosne i Hercegovine

Na današnjoj zastavi i grbu Bosne i Hercegovine nalaze se sljedeći simboli: plava boja koja simbolizira mir, žuti trougao koji pokazuje oblik naše države, a bijele zvjezdice opredijeljenost Bosne i Hercegovine ka Evropskoj uniji.



Zastava Bosne i Hercegovine



Grb Bosne i Hercegovine

Državna zastava postavlja se na državne ustanove, državna predstavništva u inostranstvu kao što su ambasade, konzulati kao i na zgradu Organizacije ujedinjenih nacija u Njujorku. Tokom državnih praznika, kulturnih manifestacija i sportskih natjecanja naša zastava se postavlja na istaknuto mjesto.

Državni grb se postavlja na državne institucije, policijske uniforme, državne dokumente i novčanice.



Pasoš Bosne i Hercegovine



Ovako se stoji za vrijeme izvođenja himne.

Himna je svečana pjesma koja se izvodi u čast domovini. Ona se izvodi za vrijeme značajnih kulturnih manifestacija i sportskih natjecanja. Pri izvođenju državne himne prisutni treba da stoje u stavu mirno.

Novac Bosne i Hercegovine je **konvertibilna marka**.



Novčanica od 100 konvertibilnih maraka